

性理大中

性理大中卷之二十四

錢塘應撝謙嗣寅父編集

河陽趙士麟玉峯父鑒定

異學

老子

程子曰。予奪翕張。理所有也。而老子之言非也。與之之意。乃在於取之。張之之意。乃在於翕之。權詐之術也。

撝謙曰。老子有言。將欲歛之。必固張之。將欲弱之。

必固強之。將欲廢之。必固興之。將欲奪之。必固與之。此言天道之自然也。將欲秋收而草木盛長。非張之之意乎。將欲衰困而骨節堅強。非強之之意乎。天欲亡吳而使夫差驟興。非興之之意乎。天欲削趙而與以上黨。非與之之意乎。此言不可恃勢之強盛而失其守柔守弱之意。故下文繼之以柔勝剛。弱勝強。魚不可脫於淵。國之利器。不可以假人。若謂老子欲以此詐人。則失老子之意矣。然而陰德自險。所以聖人謂陽剛爲君子。陰柔爲小人。

也

朱子曰。老子之術。謙冲儉嗇。全不肯役精神。須自家  
占得十分穩便。方肯做。纔有一毫於已不便。便不肯  
做。○老子之學。只要退步柔伏。不與你爭。纔有一毫  
主張計較思慮之心。這氣便麤了。故曰致虛極。守靜  
篤。又曰。專氣致柔。能如嬰兒乎。又曰。知其雄。守其雌。  
爲天下谿。知其白。守其黑。爲天下谷。所謂谿。所謂谷。  
只是低下處。讓你在高處。他只要在卑下處。全不與  
你爭。他這功夫極難。常見畫本。老子便是這般氣象。

笑嘻嘻地。便是个退步占便宜底人。雖未必肖他。然亦是他氣象也。

撝謙曰。老子謂江海所以能爲百谷王者。以其善下之。又曰。天下柔弱莫過於水。攻堅强者。莫之能勝。蓋欲剛故柔。欲上故下。欲先故後。欲張故翕。冬令歲終。實歲之始。女子事男。實子之母。其道爲老人復命。而嬰兒含和。終則有始。天行也。○乾道用剛。坤道用柔。柔以藏剛。剛以藏柔。老氏言地德而不言天德。故專氣致柔。致虛守靜。知雄守雌。下人

爲先。寶慈守齋。皆母道也。

又曰。老子之學。大抵以虛靜無爲。冲退自守爲事。故其爲說。常以濡弱謙下爲表。以空虛不毀萬物爲實。其爲治。雖曰我無爲而民自化。然不化者。亦不之問也。其爲道。每每如此。非特載營鬼一章之指爲然也。若曰。旁日月。挾宇宙。揮斥八極。神氣不變者。是乃莊生之荒唐。其曰。光明寂照。無所不通。不動道場。徧周沙界者。則又瞿曇之幻語。老子則初曷嘗有是哉。今世人論老子者。必欲合二家之似而一之。以爲神常。

載魄而無所不之。則是莊釋之所談。而非老子之意矣。○問老子道可道章。或欲以常無常有爲句讀。而欲字屬下句者。如何。曰。先儒亦有如此做句者。不妥貼。不若只作常有欲無欲點。○問道可道如何解。曰。道而可道。則非常。道名而可名。則非常名。又問玄之義。曰。玄只是深遠。而至於黑宰宰地處。那便是衆妙所在。○常有欲以觀其微。微之義。是那邊微。如邊界相似。說那應接處。谷神。谷只是虛。而能受。神謂無所不應也。○言左契受之義也。○問當其無有車之用。

曰。其嘗思之。無是穀中空處。惟其中空。故能受軸而  
運轉不窮。○儉德極好。凡事儉則鮮失。老子言事天  
治人。莫若嗇。夫惟嗇。是謂早服。早服。是謂重積德。被  
他說得曲盡。嗇。只是吝嗇之意。是要收斂。不要放出。  
重積德者。言先已有所積。復養以嗇。是又加積之也。  
如修養者。此身未有所損失。而又加以嗇養。是謂早  
服而重積。若待其已損而後養。則養之方足以補其  
所損。不得謂之重積矣。所以貴早服早服者。早覺未  
損而嗇之也。問他云。禮忠信之薄。而亂之首。孔子又



却問禮於他。不知何故。曰他曉得禮之曲折。只是他說這是个無緊要底物事。不將爲事。某初間疑有兩個老聃。橫渠亦意其如此。今看來不是如此。他曾爲柱下史。故禮自是理會得。所以與孔子說得如此好。只是他又說這個物事。不用得亦可。一似聖人用禮時。反若多事。所以如此說。

撝謙曰。老子言上禮爲之而莫之應。則攘臂而仍之。又曰。禮者忠信之薄。而亂之首。前識者。道之華而愚之始。此言末俗行禮而浮薄。用智而穿鑿。蓋

傷之也。所謂正言若反者乎。何以知其非薄禮也。觀曾子問所載。與夫子助葬於巷黨一段。不欲以人之親。病患其謹禮如此。非以禮爲不緊要之人也。欲知此意。須知林放問禮之本。子曰。喪與其易也。寧戚。子夏曰。禮後乎。子曰。起予者商也。老子謹於禮而後禮。此夫子之所從以問禮也夫。

問楊氏愛身。其學亦淺近。而舉世崇尚之。何也。曰。其學也不淺近。自有好處。便是老子之學。今觀老子書。自有許多說話。人如何不愛。其學也要出來治天下。

清虛無爲。所謂因者。君之綱。事事只是因而爲之。如漢文帝曹參。便是用老子之效。然又只用得老子皮膚。凡事只是因循包容將去。老子之學最恐他閒時。似个虛無卑弱的人。莫教緊要處發出來。更教你支吾不住。如張子房是也。子房皆老氏之學。

撝謙曰。老子有言。知者不言。言者不知。當時隱於柱下。謹於禮文。觀其於喪祭。兢兢不失。豈如後世養生者。惡一哀之傷生者乎。其意厭惡人之譏。譏自異者。欲得小國寡民而治之。使民至老死不相

往來。豈肯於聖王同文之世。創立一教。聚徒千百。鼓動天下。若楊朱之爲哉。卽老子一書。如所傳關尹喜候氣而得之。曰子將隱。強爲我著書。亦因而成之。非老子之志欲著書也。世謂孟子不闢老子。老子原無可闢。如今人並稱莊老。莊子逞放全失老子之道。○坤至柔而動也剛。其靜也翕。其動也闢。人見老子之翕也。未見其闢也。朱子謂緊要處發出來。更教你支吾不住。老子原有此作用。近世陽明用兵。其作畧多有些陰險處。亦近於老。是坤

德如此。聖人剛中之德。不喜如此。

又曰。康節嘗言。老氏得易之體。孟子得易之用。非也。老子自有老子之體用。孟子自有孟子之體用。

撝謙曰。老子有言。大道廢。有仁義。智慧出。有大僞。六親不和。有孝子。國家昏亂。有忠臣。似乎大悖聖教矣。然吾以意逆志。以爲非深觀乎治亂之世之人情。不知此也。試思聖人之教人。以仁義教人。以忠孝。豈非因世之所不足哉。一家之中。雍睦和順。一國之中。君令臣共。申生比干之行。何自見也。今

有國焉。民之質矣。日用飲食。子無孝名。臣無忠名。當亦孔子之所喟然而深與者也。末世囂競之俗。高尚節行。而矯激之風始熾。智者詐愚。勇者威怯。一家之中。一人獨稱孝子。則兄弟不安。一國之中。一人獨稱忠臣。則衆情猜忮。此非聖人之所欲也。然不得不激揚感發者。懼天下之人。相率惰行。以流爲不肖之歸。其實躬履至德。民無得而稱者。爲聖人之上願。老子之說。未爲非也。○其曰聖人不仁。以百姓爲芻狗。痛愚民不知生生之理。而自陷

於芻狗。反若罪聖人者。所謂正言若反也。○程子  
謂老子雜於權詐。朱子謂老子害於倫理。若是害  
倫理。雜權詐之人。孔子決不從之。問禮。○聖人之  
道。唯懼陰長。履霜。堅冰至。是也。老氏之道。唯懼陽  
長。物壯則老。是也。○儒伸而能屈。老屈而能伸。剛  
柔以立本。變化以趨時。合鬼與神。教之至也。○孔  
子天道之得中者乎。老子地道之得中者乎。魏伯  
陽有云。坎離者。乾坤二用。吾又於老子見之矣。○  
余嘗讀道德經爲之序曰。人之生也。非父何以教。

非母何以養。天地父母之大也。自後天既生聖人。蘊德不言。遞世無悶。而其道日崇。然天顯地藏。天實地虛。若相非者。故漢晉之爲老者。絀儒而唐宋之爲儒者。斥老。互相抵排。終非平允。蓋老子坤道也。得地道無成之義焉。易曰。坤至柔而動也剛。至靜而德方。後得主而有常。含萬物而化光。坤道其順乎。承天而時行。以此讀老子之書。庶有合矣。夫漢晉之爲老。絀儒。則既失承天之義。老子所謂言者不知。正爲此等。而後之志聖人之道。知進而不



知退以自羅其亢。殆非失養之故歟。有其善。喪厥  
善。矜其能。喪厥功。則讀老而益知聖人之大。陰陽  
固有相須之美也。然造物之理。陰不乘陽。生人之  
經。母不敵父。清談之盛也。旣以牛易馬。無極之流  
也。又以釋代帝。昭昭列象。若默運於天地之間。有  
不容以或亂者。是豈儒者之私崇其教哉。三才並  
著。而人道是庸。斯爲智矣。

釋氏

程子

明

嘗曰。昨日之會。大率談禪。使人情思不樂。歸

而悵恨者久之。此說天下已成風。其何能救。古亦有  
釋氏盛時。尙只是崇設像教。其害至小。今日之風。便  
先言性命道德。先驅了知者。才愈高明。則陷溺愈深。  
在其則才卑德薄。無可奈何他。然據今日次第。便有  
數孟子。亦無如之何。只看孟子時。楊墨之害能有甚。  
况之今日。殊不足言。此事蓋亦繫時之污隆。清談盛  
而晉室衰。然清談爲害。却只是閒言談。又豈若今日  
之害道。今雖故人有爲此學。而陷溺其中者。則旣不  
可回。今只有望於諸君耳。其術大槩。且是絕倫類。世

上不容有此理。又曰。他有个覺之理。可謂敬以直內  
矣。然無義以方外。其直內者。要之其本亦不是。○明  
道之不明。異端害之也。昔之害。近而易知。今之害。深  
而難辨。昔之惑人也。乘其迷暗。今之入人也。因其高  
明。自謂之窮神知化。而不足以開物成務。言爲無不  
周徧。實則害於倫理。窮深極微。而不可以入堯舜之  
道。天下之學。非淺陋固滯。則必入於此。自道之不明  
也。邪誕妖妄之說。競起塗生民之耳目。溺天下於汚  
濁。雖高才明智。膠於見聞。醉生夢死。不自覺也。是皆

正路之榛蕪。聖門之蔽塞。闢之而後可以入道。○佛氏之言。比之楊墨。尤爲近理。所以其害爲尤甚。學者當如淫聲美色以遠之。不爾。則駸駸然入於其中矣。朱子答吳公濟書曰。來書言儒釋之道。本同末異。熹謂本同則未必不異。末異則本必不同。正如二木是一種之根。無緣却生兩種之實。○答詹兼善曰。示喻儒釋之分。益見潛心之力。所謂釋氏一覺之外。更無分別。不復事事。而吾儒事事無非天理。此語是也。然吾儒亦非覺外。有此分別。只此覺處。便自天高地下。

萬物散殊。毫髮不可移易。所謂天敘天秩。天命天討。正在是耳。○與呂伯恭書曰。向來見人陷於異端者。每以攻之爲樂。勝之爲喜。近來惟覺彼之迷昧。爲可憐。而吾道不振之可憂。誠實痛傷。不能自己耳。此不知年老氣衰。而然耶。抑亦漸得性理之正也。○或問儒佛同異。某子曰。公本來處。還有儒佛否。朱子辨之曰。天命之性。固未嘗有儒佛也。然儒佛是非之理。則已具矣。必以未嘗有者爲言。則奚獨儒佛也。固亦未嘗有堯桀也。然堯之所以爲堯。桀之所以爲桀。則豈

可以莫之辨哉。今某子之言乃如此。是欲以無本末有無者。混儒釋而一之也。此禪學末流。淫遁之常譚。俗學之士。從風而靡。有不足怪。獨某子自謂親承有道而立言如此。則爲不可解耳。

一書有曰。釋氏之言曰。在目曰見。在耳曰聞。在鼻曰香。在口曰譚。論在手執捉。在足運奔。徧現俱該。法界收攝。在一微塵。識者知是佛性。不識者喚作精覓。他說得也好。所養者也是。只是差處。便在這裏。吾儒所養是仁義禮智。他所養者只是視聽言動。○又曰。黃蘗

性理大全卷之二十一  
一僧有偈與其母曰。先曾寄宿此婆家。止以父母之  
身爲寄宿處。其無情義。絕滅天理可知。當時有司見  
渠此說。便當明正典刑。○或問佛與老莊不同處。曰。  
老莊滅絕義理未盡。至佛則人倫滅盡。至禪則義理  
滅盡。佛初入中國。止說修行。未有許多禪的說話。○  
又曰。某見名寺中。所畫諸師祖人物。皆偉魁雄傑。其  
氣貌如此。則世之所謂富貴利達聲色貨利。如何籠  
絡得他住。他視之亦無足以動其心者。或問若非佛  
氏收拾去。能從吾儒之教。不知如何。曰。他亦未是那

無文王猶興的。只是做个特立獨行的人。所爲必可觀。若使有聖人收拾去。可知大段好。只是當時吾道黑宰宰地。只有些章句辭章之學。他如龍如虎。這些義解。都束縛他不住。必決去無疑也。然被他引去了。好人可畏可畏。

以上諸條疑是朱子說  
附入朱子諸條之下

撝謙曰。佛法自漢明帝時始入中國。傳經四十二章。聞西竺國有佛名瞿曇。生於周昭王時。其教大抵以清淨寂滅爲常。無學爲道。至晉而其說大行。



神州陸沉。自後人主常有欲滅其教者。然終不能。有崇其教而捨身爲奴者。國亦尋滅。至北朝顏之推作家訓。以爲周孔遠不逮佛氏。唯唐傳奕。闢之於前。昌黎韓子繼之。自韓文盛行。而學者始有所依據。然好之者固日甚也。至宋如呂氏韓氏諸大家。皆崇之不衰。得二程夫子。力崇正道。而朱子大其傳。明興二百年。無敢以佛老之單言隻字入於經義者。可謂盛矣。於是天下之禪者。痛心疾首於朱子。欲得而甘心焉。而陽明氏之興。則禪者翩然。

不戒以孚。亦其勢也。竊嘗原其本而論之。天地之至陰。成於西南。而西竺正當其地。極南大暑。極北大寒。故中國至交廣。炎暑鬱蒸。已大異河洛。而况復南去。幾至赤道之下。則其地四時暑燠。使中國之人。移居此地。當如魚遊沸鼎。無可久安。唯佛以至陰之性。降生此地。教之以虛空不壞。以搖動者。名之爲塵。以不住者。名之爲客。以至靜常住者。爲真心。而彼身家念重。淫殺紛紜。一聆其說。卽時身心泰然安穩。此如大暑渴行之人。而得哀梨。何可

非也。當時使聖人生於其地。亦不能不從無學矣。今中國則不然。暑往寒來。寒往暑來。其人能動能靜。以中和爲教。以生生爲本。偏動則不成。偏靜則不生。故唯時中之聖人。能盡其道。此所謂布帛菽粟。何可一日廢也。故西方之佛不可闕。而中國之佛可闕也。然中國當唐虞三代之時。方內父安。生民和樂。鰥寡孤獨。皆有所養。父慈子孝。夫義婦從。室家和睦。兵革不試。此其民雖驅之從佛。亦必不從。至於後世。生養不遂。教化不行。有父而不養其

子者。有子而不養其父者。有室家相棄而無所歸者。兵革繁興。有連州屠戮者。有辱及母妻者。民當此時。不復有生人之樂。而歸於空門。以盡其命。因以其說。化世人之貪淫殺奪妄欲不已者。苟有是人。吾猶將禮之方外。而安得闢之。但中國之所以至此者。皆由聖人之道。不明不行。少而不學。長而無聞。遺棄人倫物理。以徇其私欲。任其偏見。甚者則掊克百姓之膏脂。以飾佛宮之金碧。而自以爲功德。是以天下大亂。四民失業。故釋氏之徒。其崇

佛者不可闢。而孔氏之徒。其崇佛者深可闢也。然使世之學者。雖讀書婚宦。而終日周旋於伽藍之宇。喜誦佛號。精研釋典。而號召鄉里。勤爲護法。此不過爲釋氏之檀越。施主居士而已。如人之好食水品。或病清冷。亦未嘗有害於聖教也。唯是有人焉。誦聖人之詩書。以致宦達。成大名。欲招聚天下之生徒。以爲天下之師表矣。而於庶物猶未明。人倫猶未察也。遽取楞嚴金剛之說。以附會於聖訓之一二語。而以爲天下之理。有不必學者。凡後生

小子欲從事於孔氏之學者。往而問道焉。皆告之  
以不思不勉之妙。以爲凡聖人之博學審問慎思  
明辨者。但以求至於心空之地。而吾苟至於心空  
則天下之事物。可以不必審察。從心所欲而無不  
得其當。於是天下之間途於東魯者。莫不奔趨於  
西竺。而先聖人之所謂不偏於動。不偏於靜者。莫  
不詆爲支離未瑩之談。而孔子之道熄矣。於是天  
下雖有渾然質厚之君子。一入其說。則莫不師心  
自是。而不可以入堯舜之道。故儒而好佛者。不必

闢而以釋而爲儒者。深可闢也。然中國之人性本  
明通。辨於是非。若竟以西方本教施之中國。必不  
能行。自達摩之入也。變靜爲動。不立語言文字。以  
棒喝爲教。凡儒士之與之言者。皆無所用其辨說。  
則莫不訝然失其所恃。夫俗儒於中庸之道。本行  
不著。習不察。所恃者詩書耳。至其聞見不足恃。於  
是以吾之所學者果非也。乃俛首而入其教。凡梵  
音咒語。不可解說之談。敬若神明。而大聖人平正  
通達。千萬年垂訓之典謨。不以爲章句。則以爲糟

粕而六經雖存而實廢。羣天下少年之士。一志於  
道。卽進叅□喫茶□竹篋之說。以亂其是非。  
而鶻突其心志。亦已甚矣。又中國之人。本好婚宦。  
生養。有功有名。不樂槁寂。而先儒之闢佛者。每以  
爲清淨寂滅。不足開物成務。於是禪伯之欲雪此  
言者。不講出世。而講入世。侃侃而談者。皆機權作  
畧。反詆吾儒之迂疎無用。爲吾儒者。亦未知聖人  
之道。以忠信爲主。以事功爲卑。亦欲效鉛刀之一  
試。而那移其心術。以就功利。又聖賢經濟。雖當就



事上歷練。然必學古入官。尙友論世。方通於古今。而無弊。今乃鄙薄學問之士。爲章句之儒。而所見所聞。不過末俗機變傾危之習。於是曹操桓溫。駸駸乎登孔堂而講學。故以禪爲禪者。不必關。而以霸爲禪。以禪爲儒者。深可關也。關之何如。明其在。我而已矣。○人性有神。有鬼。能識者。神能記者。鬼。遷流者。神。確靜者。鬼。今釋氏賤識神。惡輪轉。去眼耳鼻舌身意。悉歸於無鬼之盛也。○佛以无生爲樂。萬物不足以動其心。極其性。永無生理。但陰性。

大慈。孳孳救物。以此一念。遂時煅於猛火之中。成  
西金之質。而爲萬物之母。○天下之靜物。至剛而  
至順者。莫若金也。百煅而不變。可不謂剛乎。唯人  
所革。無不從范焉。可不謂順乎。天下之動物。至剛  
而至順者。莫若牛也。力舉千斤。可不謂剛乎。唯人  
所役。無不從欲焉。可不謂順乎。佛道如是。○老氏  
內守。中外不見可欲。滅外故入幽而不息。生內故  
保陽而續生。釋氏於內外。無不滅也。○老與釋皆  
陰也。然老柔而釋剛者。何也。水陰中有陽。故柔也。

冰陰中無陽。故剛也。○佛謂衆見皆爲青妄。吾試問佛。目青之人。夜見燈光。別有圓影。五色重疊。既有青妄。何不夜見燈光。別有卉木。灼艷紛華。由此言之。青病之中。亦有誠理。○神以知來。智以藏往。神出於覓。智出於鬼。佛知鬼而不知覓。故曰識性無源。由於六種根塵妄出。其所言智。皆是藏往。故曰聲銷無響。汝說無聞。若實無聞。聞性已滅。同於枯木。鐘聲更擊。汝云何知。又曰如重睡人。夢中聞春搗聲。別作他物。或爲擊鼓。或爲撞鐘。卽其夢時。

自怪其鐘爲木石響其形雖寐聞性不昏所謂寤  
通來事寐緣夙心堅守記性以爲真常棄諸識性  
不使流轉○中庸言至誠無息故生物不測於穆  
不已楞嚴言大地山河因虛妄終而復始一以爲  
誠一以爲妄儒言父慈子孝資於事父以事母而  
愛同佛以父母子孫相生不斷以欲貪爲本乃欲  
滅之維偏方所生成此偏性一生一滅乃欲合而  
一之惑矣○人不可生物不可殺禁人倫生育之  
源滋異類日長之勢使普天之中如此者五十年

則往來者唯禽獸矣。○佛之禁殺非貴獸也。謂人獸相變。嫌其同類也。吾儒則不然。所貴人性者。貴其異獸也。聖人誅奸除寇。豈非人哉。以禽獸之心。食禽獸之肉。則不可以服禽獸。○聖人不廢殺。所以成生生之大德。佛氏諱言殺。極其成就。乃至於不生。○佛教之人也。止陽之過也。萬物皆致養焉。其變而爲宗也。所謂東北喪朋。乃終有慶者歟。○聖人徵人不徵鬼。故所言皆其長也。佛氏明鬼不。明人。故所言皆其消也。何謂徵人不徵鬼。三綱五

常陽道也。人道也。何謂明鬼。不明人。三塗六道。陰道也。鬼道也。以人道前。民則萬物日伸。以鬼道前。民則萬物日屈。○聖人哀諸鬼之在於冰室。佛氏哀衆人之在於焚室。○佛言。大地山河。皆見妄所生。而其書所謂。面放日光。頂出寶蓮。世人則從而信之。非見妄之尤者乎。○佛經多妄。僞由於譯者。欲其教之速行耳。

### 南北道統論

嗚呼。天地之道。動靜而已矣。凡曰有日。實曰感曰生。

皆動之類也。陽也。剛也。凡曰無曰虛曰寂曰滅皆靜之類也。陰也。柔也。此天下人之所共知也。動靜不失其時則善。動靜各任其偏則惡。故聖人兼體陰陽而御之以道。道者。時中而已矣。中有定位者也。有定位則靜矣。時中無定位者也。無定位則動矣。一動一靜之間者。中也。人之性也。故性發而爲情。情斂而成性。先後無端也。中原之地。北爲陽方。南爲陰方。古帝王以剛中御世。都乎北而未闢乎南。自王道之衰而吳楚始強。至漢而南方悉闢。自江右王弼之易行。羣尙

玄虛晉遂以牛易馬去北都南至劉宋而南北並帝  
莫知所主也。隋史有言南學簡約得其精華北學深  
蕪窮其枝葉則當時所尙可見也。二氏盛行於中夏  
微昌黎之雄文衛道天下安知崇孔氏乎。濂溪以後  
學者始內求性命。然而有可言者明道伊川皆生中  
州一近柔中一近剛中而皆南學於道州自龜山之  
還吳明道曰吾道南矣其後豫章之未發新安之中  
虛猶道州之主靜也。元人稱南有吳澄北有許衡而  
許之力主剛方吳之專崇覺性亦若有地力焉以攝



謙觀之。南多暑氣。發而不斂。則以靜爲宜。北多寒氣。斂而不發。則以動爲宜。合古今論之。則剛中者大亨。柔中者小亨也。先剛中而變柔中者。天德之无首。樂柔中而憚剛中者。陰德之包承也。此其學不始於後代。自夫子之教。顏子曰。博文約禮。其教仲弓曰。主敬行恕。先儒以顏爲乾道。仲爲坤道焉。又其次者。游夏皆稱文學。而游生南方。教先重本。夏生北方。教在循序。在聖門而已然矣。豈非氣固陰陽。習常罔覺哉。昔天子建都南極。因世之變。有中道焉。嗣其後者。偏柔

失位靖難北來。並建兩都。南虛北實。及明之中。爰正  
先師之號。龍德先天。嗚呼得之矣。正嘉之間。文盛陽  
過。陽明王子。幼學於程朱。長化於佛老。乃以無學之  
道。畜而止之。原其意。蓋深痛世之文士。講習而不行。  
遂欲以師心之行。廢推致之識。其廓清榛莽。不爲無  
功。然其學得於西南。化被中土。遂掩離而蝕之。其徒  
龍谿。變顏氏之屢空。爲龐氏之心空。以章句爲厲戒。  
混儒釋爲一家。於是孔氏之學。明而復晦。當佛氏之  
盛。好者以爲遠。非周孔所及。迄聖教著明。則無敢爲

此說者。宋之大慧教張侍郎以禪語解經。而內漬之。至今日而其術大行矣。夫道州主靜之言。承感動之後。非偏靜也。新安中虛之教。爲存主之功。非廢學也。於是猶以爲未瑩。猶以爲支離。而必欲直造禪宗。侈稱大覺。豈知去西逾近。去中逾遠哉。愚以爲前世南方之學者。北學於中國。而後世雖程許之賢。皆南學焉。信乎其有時也。然寬柔之人。多不能自立。而都平南者。每廢乎弱。雖能立者。亦不能久。豈易所謂剛失位而不中。爲不可大事者歟。學者之事性。但當明其

德性有靜有動。而仁義禮智之德。則貫乎動靜之間。方其靜也。渾然中氣。雖無五德之迹。而其體具存。及其動也。發爲惻隱羞惡恭敬是非之情。而無過不及。乃見人性之爲中。雖動靜之變。隨時與地而互易焉。而五德者。不易庶乎。其不偏於剛柔。而不與南北之強同譏矣。化偏爲中。其今日此書之指要歟。

北方之學。卑而實。南方之學。高而虛。世之治也。地氣自北而南。學必由卑以達高。其子弟必循循於章句訓詁。威儀揖讓。以漸至於上達。世之將亂也。學必矜

高以耻卑其學者多脫畧行誼不屑章句好言虛無  
以爲超悟此兩者陰陽勝復循環迭至極其所屆雖  
各有其弊然下  
之原不可不識也

性理大中卷之二十四終

性理大中卷之二十五

錢塘應撝謙嗣寅父編集

河陽趙士麟玉峯父鑒定

史學

朱子曰。或謂五帝紀所取多古文尚書及大戴禮爲主。爲知所考信者。然伏羲神農。見易大傳。乃孔聖之言。而八卦列於六經。爲萬世文字之祖。不知史遷何故。乃獨遺而不錄。遂使史記一書。如人有身而無首。此尚爲知所考信耶。○司馬子長動以孔子爲證。不

知是見得。亦且是如此說。所以呂伯恭發明得非細。只恐子長不敢承領耳。○史記亦疑當時不會得刪改脫藁。高祖紀記迎太公處。稱高祖。此樣處甚多。高帝未崩。安得高祖之號。漢書盡改之矣。左傳只有一處。云陳桓公方有寵於王。○史記以爲湯與王季同世。由湯至紂。凡十六傳。王季至武王。纔再世耳。是文王以十五世之祖。事十五世之孫。紂。武王以十四世祖而伐之。豈不甚謬戾耶。○古史言馬遷淺陋而不學。疎畧而輕信。此二句。最中馬遷之失。呂伯恭極惡。

之。古史序云。古之帝王。其必爲善。如火之必熱。水之必寒。其不爲不善。如騶虞之不殺。竊脂之不穀。此語最好。某嘗問伯恭。此豈馬遷所能及。然子由此語雖好。又自有病處。如云帝王之道。以無爲爲宗之類。他只說得个頭勢大。下面工夫。又皆空疎。亦猶馬遷禮書云。大哉禮樂之道。洋洋乎鼓動萬物。役使羣動。說得頭勢甚大。然下面亦空疎。却引荀子諸說以足之。又如諸侯年表。盛言形勢之利。有國者不可無。末却云。形勢雖強。要以仁義爲本。他上文本意主張形勢。



而其末却如此說者。蓋他也知仁義是個好的物事。不得不說。且說教好看。如禮書所云。亦此意也。伯恭極喜渠此說。以爲遷知行夏之時。乘殷之輅。服周之冕。爲得聖人爲邦之法。非漢儒所及。此亦衆所共知。何必馬遷。然遷嘗從董仲舒游。史記中有余聞之。董子云。此等語言。亦有所自來也。遷之學也。說仁義也。說詐力也。用權謀也。用功利。孔子說伯夷求仁得仁。又何怨。他一傳中。首尾都是怨辭。盡說壞了伯夷。子由古史皆刪去之。盡用孔子之語作傳。豈可以子由

爲非。馬遷爲是。聖賢以六經垂訓。炳若丹青。無非仁義道德之說。今求義理。不於六經。而反於淺陋疎畧之子長。亦惑之甚矣。○溫公通鑑。以魏爲主。故書蜀丞相亮。寇何地。從魏志也。其理都錯。某所以作綱目。以蜀爲主。後劉聰石勒諸人。皆晉之故臣。故東晉以君臨之。至宋後魏諸國。則兩朝平書之。不主一邊。年號只書甲子。○通鑑例。一年或數次改年號者。只取後一號。故石晉冬始篡。而以此年系之。曾問呂丈。呂丈曰。到此亦須悔。然多了。不能改得。某只以甲子繫。

年下面注所改年號。○或問溫公舊例年號皆以後改者爲正。此殊未安。如漢建安二十五年之初。漢尚未亡。今便作魏黃初元年。奪漢太速。與魏太遽。大非春秋存陳之意。恐不可以爲法。此類尚一二條。不知前賢之意。果何如耳。○問正統之說。自三代以下。如漢唐亦未純乎正統。乃變中之正者。如秦西晉隋。則統而不正者。如蜀東晉。則正而不統者。曰何必恁地論。只天下爲一。諸侯獄訟皆歸。便是得正統。其有正有不正。又是隨他做。如何恁地論。有始不得正統而

後方得者是正統之始。有始得正統而後不得者是正統之餘。如秦初未得正統。及始皇併天下。方始得正統。晉初亦未得正統。自泰康以後。方始得正統。隋初亦未得正統。自滅陳後。方得正統。如本朝自太宗并了太原。方是得正統。又有無統時。如三國南北五代。皆天下分裂。不能相君臣。皆不得正統。某嘗作通鑑綱目。有無統之說。此書今未及脩。後之君子。必有取焉。溫公只要編年號相續。此等處。須把一個書帝書崩。而餘書主書殂。既不是他臣子。又不是他史官。

只如傍人立看一般。何故作此尊奉之態。此等處合只書甲子。而附註年號於其下。如魏黃初幾年。蜀章武幾年。吳青龍幾年之類。方爲是。又問南軒謂漢後當以蜀漢年號繼之。此說何如。曰如此亦得。他亦以蜀漢是正統之餘。如東晉亦是正統之餘也。又問東周如何。曰畢竟周是天子。又問唐後來多藩鎮割據。則如何。曰唐天下甚濶。所不服者。只河北數鎮之地而已。○問宋齊梁陳正統如何。書曰自古亦有無統時。如周亡之後。秦未帝之前。自是無統屬的道理。南

北亦只是並書。又問東晉如何書。曰宋齊如何比得東晉。又問三國如何書。曰以蜀爲正。蜀亡之後無多年。便是西晉。中國亦權以魏爲正。又問後唐亦可以繼唐否。曰如何繼得。○綱目參取史法之善者。如權臣擅命。多書以某人爲某王某公。范曄却書曹公自立爲魏王。綱目亦用此例。○楊雄荀彧二事。按溫公舊例。凡莽臣皆書死。如太師王舜之類。獨於楊雄。匿其所受莽朝官稱。而以卒書。似涉曲筆。不免却按本例書之。曰莽大夫楊雄死。以爲足以警夫畏死失節。

之流。而初亦未改溫公直筆之正例。苟或却是漢侍中光祿大夫。而參丞相軍事。故但據實書之曰。某官某人自殺。而系於曹操擊孫權至濡須之下。非故以或爲漢臣也。然悉書其官。亦見其實漢天子近臣。而附賊不忠之罪。非與其爲漢臣也。此等處。當時極費區處。不審竟得免於後世之公論否。○因說通鑑提綱例。凡逆臣之死。皆書曰死。至狄仁傑。則甚疑之。李氏之復。雖出於仁傑。然畢竟是死於周之大臣。不柰何也。教相隨入死例。書云某年月日狄仁傑死也。○

問溫公以正直中和爲德。聰明強毅爲才。曰皆是德也。聖人以仁智勇爲德。聰察便是智。強毅便是勇。○子由古史舜記所論三事。其一許由者是已。然當全載史遷本語。以該卞隨務光之流。不當但斥一許由而已也。然太史公又言箕山之上。有許由冢。則又明其實有是人。亦當世之高士。但無堯讓之事耳。此其曲折之意。蘇子亦有所未及其一瞽象殺舜。蓋不知其有無。今但當知舜之負罪引慝。號泣怨慕。象憂亦憂。象喜亦喜。與夫小杖則受。大杖則走。父母欲使之。



未嘗不在側。欲求殺之。則不可得而已耳。不必深辨。瞽象殺舜之有無也。其一舜禹避丹朱商均。而天下歸之。則蘇子慮其避之。足以致天下之逆。至益避啓。而天下歸啓。則蘇子又譏其避之。爲不度而無耻。於是凡孟子史遷之所傳者。皆以爲妄誕而不足信。今固未暇質其有無。然蘇子之所以爲說者。類皆以世俗不誠之心。度聖賢。則不可以不辨之也。聖賢之心。淡然無欲。豈有取天下之心哉。顧辭讓之。發則有根。於所性而不能已者。苟非所據。則雖卮酒豆肉。猶知

避之。况乎秉權據重。而天下有歸已之勢。則亦安能無所惕然於中。而不遠引以避之哉。避之而彼不吾釋。則不獲已而受之。何病於逆。避之而幸其見舍。則固得吾本心之所欲。而又何耻焉。唯不避而强取之。乃爲逆。偃然當之而彼不吾歸。乃可耻耳。如蘇子之言。則是凡世之爲辭讓者。皆陰欲取之。而陽爲遜避。是以其言反於事實。至於如此。則不自知其非也。舜禹之事。世固不以爲疑。今不復論至益之事。則亦有不能無惑於其說者。殊不知若太甲賢而伊尹告歸。

成王冠而周公還政。宣王有志而共和罷。此類多矣。  
當行而行。當止而止。而又何耻焉。蘇子蓋賢共和而  
尚何疑於益哉。若曰受人之寄。則當遂有之。而不可  
歸。歸之則爲不度而無耻。則是王莽曹操司馬懿父  
子之心。而楊堅夫婦所謂騎虎之勢也。乃欲以是而  
語聖賢之事。其亦誤矣。

### 論史

涑水司馬氏曰。晉獻公使荀息傅奚齊。荀息曰。臣竭  
其股肱之力。不濟則以死繼之。及里克殺奚齊。荀息

死之。君子曰。詩所謂白圭之玷。尚可磨也。斯言之玷。不可爲也。荀息有焉。杜元凱以爲荀息有此詩人重言之義。以愚觀之。元凱失左氏之意多矣。彼生與君言死而背之者。是小人穿窬之行。君子所不譏也。夫立嫡以長。正也。獻公溺於嬖寵。廢長立少。荀息爲國正卿。君所倚信。不能明白禮義。以格君心之非。而遽以死許之。是則荀息之言。玷於獻公未沒之前。而不可救於已沒之後也。然則左氏之志。所以貶荀息。而非所以爲褒也。

楊謙曰。以荀息之智。能料虞之君臣成敗。明如指掌。而不能料通國神人之憤。能不愛死於君歿之後。而不能直言於君在之時。真有不可解者。此亦無他。貪一時之寵榮。甚於愛身耳。

問子產。朱子曰。觀他與韓宣子爭時。似守得定。及到伯有子皙之徒撓他時。則度其可治者治之。若治他不得。便只含糊過亦然。當時列國世卿。每國須有三兩族強大。根株盤互。勢力相依倚。卒急動他。不得。不。比如今大臣。才被人論。便可逐去。故當時自有一般。

議論如韓獻子分謗之說。只是要大家含糊過。不要見得我是你。不是。又如魯以相忍爲國。意思都如此。後來張文潛深取之。故其所著。雖連篇累牘。不過只是這一意。

撝謙曰。孟子言不得罪於巨室。亦是此意。大抵得政之始。便與豪強作對。多行不去。如孔子爲政於魯。全以季桓子爲助。及桓子有異。孔子只得去了。西山真氏曰。子產以鄭簡公十二年爲卿。明年得政。簡公在位三十六年。乃卒。又歷事定公。獻公。聲公。合

凡四十餘年。方其始也。內則有諸大夫之爭權。互相  
誅殺。外則晉楚之兵。無歲不至城下。國之危且溺。幾  
不可爲矣。子產於此。從容回斡。皆有次第。其於內也。  
務息諸大夫之爭。而去其尤不可令者。然根之難拔  
者。不輕動以激其變。惡之旣稔者。不緩治以失其機。  
有勸懲之公。而無忿疾之過。故自子南逐。子晳死。豪  
宗大姓。弭然聽順。無復有梗其政者。其於外也。事大  
國以禮。而不苟徇其求。故終其身。免於諸侯之討。而  
鄭能以弱爲強。考其所爲。唯作丘賦。鑄刑書。見譏當

世自餘鮮不合於理者。然大人格心之業。則未之聞焉。豈其所事四公皆凡庸之主。不足與有進耶。不然。何其無有以一善著者。至於用人。各以所長。蓋得聖門所謂器使之道。春秋卿大夫未有能及之者。後之權衡人物爲職者。當觀法焉。

問開阡陌。朱子曰。阡陌便是井田。陌百也。阡千也。東西曰阡。南北曰陌。或言南北曰阡。東西曰陌。未知孰是。但却是一个橫。一个直。且如百夫有遂。遂上有涂。這便是陌。若十个涂。恁地直。在橫頭。又作一大溝。謂



之洫。洫上有路。這便是阡。阡陌只是疆界。自阡陌之外。有空地。則只恁地閒在那裏。所以先王要如此者。也只是要正其疆界。怕人相侵互。而今商鞅却開破了。遇可做田處。便墾作田。更不要恁地齊整。這開字。非開創之開。乃開闢之開也。

問蘭相如。朱子曰。子由有一段說。大段取他。說他不是戰國之士。此說也太過。其實他只是戰國之士。龜山亦有一說。說相如不合要。與秦爭那壁。要之恁地說。也不得。和氏璧也是趙國相傳。以此爲寶。若當時

驟然被人將去。則國勢也解。不振。古人傳國。皆以寶玉之屬爲重。若子孫不能謹守。便是不孝。當時秦也是強。但相如也是料得秦不敢殺他。後方恁地做。若其他人。則是怕秦殺了。便不敢去。如藺相如。豈是孟浪恁地做。他湏是料度得那秦過了。

藺謙曰。若國家重寶。被人脅去。不敢與抗。將來將相羣臣。皆莫敢自固。誰肯事此小朝廷。宋以侂冑首界金。其亡勢已成於此。然如相如所爲。亦大非體。吾謂爲趙者。亦數言而決耳。復命於使曰。一璧。

至微也。煩大國以使來。敢不承命。然先人之守器也。寡君不敢擅以奉君。至大國城邑。小國安敢妄貪。恐冀非望之福。以徵厚禍。寡君敢辭。如是則秦人亦無辭以興師。縱使以一璧之故興師。則士民必不直其君。難以冀勝矣。

又曰。廣武之會。太公既已爲項羽所執。高祖若去求告他。定殺了。只得以兵攻之。他却不敢殺。時高祖亦自知漢兵已強。羽亦知殺得無益。不若留之。庶可以結漢之懽心。問舜棄天下。猶敝屣。曰如此。則父子俱

就戮耳。亦救太公不得。若分羹之語。自是高祖說得不是。

馮謙曰。高祖之不孝。在不先安太公於關中。而先置酒高會。若此。已先有不顧其父之意。至分羹之語。雖故作忍心之言。然豈無可以正對者。而爲此梟獍之說。若以余意。不若直謂之曰。吾今日騎猛虎。安可中下。吾下汝。則父子俱就戮耳。吾攻汝。汝殺吾父。吾不攻汝。汝亦殺吾父。吾寧攻汝。爲報仇之兵爾。且吾與汝。俱受命懷王。約爲兄弟。吾戰勝

獲汝。置汝善地。不汝殺也。封汝子以大國。汝苟殺  
吾父。吾磔汝於市。族誅不赦。如此答之。亦正。羽苟  
肯還吾父。雖退守關中可也。人已赦吾父而還之。  
吾不之德。以德爲怨。擊而殺之。雖謂有分羹之心。  
可矣。

或問養虎自遺患事。張良當時若放過。恐大事去矣。  
如何。朱子曰。若只計利害。卽無事可言者。當時若放  
過未取。亦不過三年耳。

撝謙曰。以愚言之。赦父之恩。不可忘也。雖終身無

取可也。天命苟歸吾。以羽之暴。自當有取之者。何急焉。子不云乎。以德爲怨。刑戮之民也。曰然。則張良勸之何如。曰良自爲韓成報讎爾。此黃老毒手。非正道也。

或問肉刑始於苗。堯因之而不革。更虞夏商周而又不革。漢文以一女子之言而革之。何唐虞三代不知出此也。文帝除之。而刑亦措。何耶。潛室陳氏曰。先儒謂井田學校封建肉刑四者廢一不可。不知秦變古法。凡古人教民養民處。掃地不存。卽獨留肉刑以濟

其虐。雖微文帝。必有變之者。此蓋損益盈虛。理勢必至。能通變宜民。雖成康復起。不能易也。

或問漢宣帝言漢雜王霸。此說也。似是。朱子曰。宣帝也不識王霸。只是把寬慈的便喚做王。嚴酷的便喚做霸。

楊謙按。以善養人者王。以威服人者霸。雜霸王道。用之。此一語微獨漢。自三代後。恐皆出不得此語。龜山楊氏曰。張良蓋始終爲韓者。方沛公爲漢王之國。遣良歸韓。良因說沛公燒絕棧道。此豈復有事漢。

之意及良歸至韓。聞項羽以良從漢王。故不遣韓王。  
成之國與俱東。至彭城殺之。先是良說項梁以韓諸  
公子橫陽君成可立。梁遂使良求韓成。立爲韓王。良  
爲韓司徒。良以韓成見殺之故。於是又間行歸漢。其  
意蓋欲爲韓報項羽也。至漢高祖用其謀。已破項羽。  
平定天下。從高祖西都關中。於是始導引辟穀。有從  
赤松子之語。蓋爲韓報仇之心。於是方已故也。其臣  
高祖。非其心也。不得已耳。

南軒張氏曰。高帝之英武。慢侮士大夫。其視隨何。鄒



食生陸賈輩。皆撫而忽之。至如蕭相國之功。一旦下之廷尉。亦不顧也。獨於子房。蓋敬而不敢慢。順而不可強。則以子房所守在義。而不以利故爾。

程子曰。人臣之義。當以王陵爲正。○陳平雖不知道。亦知學。如對文帝以丞相之職。非知學安能此。

問魯兩生。潛室陳氏曰。叔孫通盜儒。稍有節操。人便不因之而進。兩生不是欲待百年。但以叔孫通非興禮樂之人。故設辭以拒之耳。

或問亞夫軍中聞將軍令。不聞天子詔。是否。朱子曰。

此軍法

或問賈誼。程子曰。誼之言曰。非有孔子墨翟之賢。孔與墨一言之。其識末矣。其亦不善學矣。

元城劉氏曰。公孫弘。姦詐人也。亦有長處。諫罷西南夷。不用卜式。誅郭解是也。此三事得大臣之體。

龜山楊氏曰。周勃起布衣。蓋椎朴鄙人。以其重厚。故可屬大事。則天下重任。固非狷忿褊迫者。所能勝也。武帝時。淮南王欲反。獨畏汲黯之節義。至論公孫弘輩。若發蒙耳。夫汲黯之直。爲天下敬憚如此。予獨疑

其狷忿褊迫。臨大事不能無輕動。輕動則失事。幾難與成功。

或論疏廣疏受。不合徒享爵位而去。又不合不薦引剛直之士。代已輔導太子。朱子曰。疏廣父子亦不必苛責之。雖不盡出處之正。然在當時。親見元帝懦弱。不可輔導。他只得去。亦是避禍而已。觀渠自云。不去懼貽後悔。亦自是省事恬退的。世間自有此等人。他性自恬退。又見得如此。只得去。若不去。蕭望之便是樣子。望之卽剛直之士。

南軒張氏曰。魏相所存。不得爲正。觀其有許史之累。則可見矣。夫欲其說之行。而假許史以爲重。此詭遇獲禽之心。君子不道也。然其爲相。亦有可取者。四方有異聞。或有逆賊災變。輒奏言之。此誠宰相事也。其諫伐匈奴書。有曰。今郡國守相多不實選。風俗猶薄。水旱不時。按今年子弟殺父兄。妻殺夫者。凡二百二十二人。臣愚以爲此非小變也。凡此在他人。不知爲憂者。而相獨知憂之。亦槩乎有聞矣。故予甚惜其進之不以正也。進不以正。則牽制徇從之事必多。而感

格正救之風或鮮矣。○漢將誠當以趙克國爲最。凡將之病。患於勇而不詳也。克國蓋更軍事多矣。及聞西羌之事。則不敢以遽。而曰兵難過度。願馳至金城。圖上方畧。其不敢忽如此。蓋思慮之深。經歷之多。孔子所謂臨事而懼。好謀而成者也。將之病。在於急近功也。克國則圖其萬全。陳屯田十二利。持久而爲不可動之計。其規模與孔明渭上之師。何以異哉。將之病。在果於殺而不恤百姓也。克國任閫外之寄。而爲國家根本之慮。要使百姓安。邊圉疆而西戎坐消焉。

此殆三代之將。非戰國以來摧鋒折敵者所可班也。反覆究其規模。味其風旨。遠大周密。拔出倫輩。予謂充國在宣帝時。且不獨爲賢將。殆可相也。使其爲相。必能爲國家圖回制度。爲後世慮。安養百姓。爲邦本計。如魏相輩。皆當在下風耳。

涑水司馬氏曰。當丙吉爲政之時。政治之未得。刑罰之失中。不肖之未去。忠賢之未進。可勝紀哉。釋此不慮。而慮於牛喘。以求陰陽。不亦疎乎。

朱子與何叔京論光武事曰。成哀以下。卽陵爲廟。似

已允當。蓋彼皆致寇亡國之君。又未嘗命光武以興復。自不當更立廟於京師也。如漢獻帝。晉懷帝。又不  
同。蓋昭烈。元帝。嘗受二帝之命矣。此等事。乃禮之變  
節。須精於義理。乃能於毫釐之間。處之不差。

又曰。古之名將。能立功名者。皆是謹重周密。乃能有  
成。如吳漢。朱然。終日欽欽。常如對陳。須學這樣的方  
可。如劉琨。恃才傲物。驕恣奢侈。卒至父母妻子。皆爲  
人所屠。今人率以才自負。自待以英雄。以至恃才傲  
物。不能謹嚴。以此臨事。卒至於敗而已。要做大功名。

的人越要緊密。未聞粗鹵濶略而能有成者。

勉齋黃氏曰。陳太丘送張讓父之喪。人以爲善類。賴以全活者甚衆。前輩亦以爲太丘道廣嘗竊疑之。如此則枉尺直尋。而亦可爲歟。士君子行已立身。自有法度。有義有命。豈宜以此爲法。天地如此其廣。古今如此其遠。人物如此其衆。便使東漢善類盡爲宦官所殺。世亦曷嘗無善類哉。若使是真丈夫。又豈畏宦官之禍。而藉太丘如此之屈辱。以全其身哉。吾人於此等處。直須見得分明。不然未有不墮坑落塹者也。



程子曰。東漢趙苞爲邊郡守。虜奪其母。招以城降。苞  
遠戰而殺其母。非也。以君城降而求生其母。固不可。  
然亦當求所以生母之方。柰何遠戰乎。不得已。身降  
之可也。王陵母在楚。而使楚質以招陵。陵降可也。徐  
庶得之矣。

朱子曰。近看溫公論東漢名節處。覺得有未盡。但知  
黨錮諸賢。趨死不避。爲光武明章之烈。而不知建安  
以後。中州士大夫。只知有曹氏。不知有漢室。却是黨  
錮殺戮之禍。有以毆之也。

是孔明之意。然在當時多有不盡曉處。如先主東征之類。不見孔明一語議論。後來壞事。却追恨法孝直若在。則能制主上東行。孔明得君如此。猶有不能盡言者乎。

楊謙曰。孔明有不純正處。如教後主以申韓等書是也。先主東征。孔明之諫。此極可曉。孔明是大臣。其論此事。必造辟密言。見先主意決。只得奉行。不敢有二。而歸失於君。此大臣之體。不然。何以追嘆法孝直。

魯齋許氏曰。不問利害。只求義理。孔明見得真。當時只有復漢討賊爲當然。至於成敗利鈍。非臣之明所能逆睹。歸之於天而已。只得如此做。便是聖賢之心。常人則必計其成敗利害也。

臨川吳氏曰。開誠心。布公道。集衆思。廣忠益。諸有忠慮於國。但勤攻吾之闕。漢丞相諸葛武侯語也。可以爲萬世相天下者之法矣。

檇謙曰。孔明自言先帝知臣謹慎。故臨崩寄臣以大事。今之稱孔明用智者。正與相反。

南軒張氏曰。溫太真少時。嘗以孝友篤至。稱一旦奉  
劉琨之檄。將命江左。母崔固止之。不可。至於絕裾而  
行。噫。太真有母在此。身固不得以許琨矣。獨不見徐  
元直之事乎。元直所謂方寸亂矣。蓋其天性不可已  
者也。而太真獨忍於此乎。若旣以委質爲人之臣。當  
危難而無避可也。將命之舉。豈無他人。太真念母。獨  
不得辭乎。度其意。不過以江左將興。奉檄勸進。徼幸  
投富貴之機。赴功名之會耳。而其所喪。不過甚乎。或  
曰。使太真不來江左。則寧復有後世之事業。太真固

不得以兩全矣。此殆不然。昔人之事業皆非有所爲而爲之。事理至前。因而有成之耳。若懷希慕求必之心。則亦私欲而已。苟可以就異日之事。則凡背親賊性。皆可以屑爲。此三綱之所由壞。而弊之所由生也。故伯夷叔齊不受其國。夫子以爲求仁而得仁。商之三仁。微子不得不去。箕子不得不奴。比干不得不死。皆素其位而行也。豈直太真之事業爲不足道。就使太真能佐晉室。克復神州。一正天下。勲烈如此。浮雲之過太虛耳。豈足以塞其天性之傷也。夫太真順母

之心而終其身。雖泯滅無聞於後。顧其所全者大於身。無愧焉。能以此易彼哉。故予謂太真稱爲功名之士。則可。尚論古人。則可憾矣。

馮謙曰。太真以涕泗詐王敦。此等事皆君子所不能爲。吾終疑其心。○王坦之謝安兩人。人皆優謝。以坦之倒執手板。不及安雅量耳。不知此其小者。安暮功之慘。不廢絲竹。坦之致書曰。天下之寶。當爲天下惜之。此真宰相之言。

臨川吳氏曰。人道三綱爲首。靖節先生一身而三綱

舉無愧焉。忘言於真意。委運於大化。則幾於同道矣。誰謂漢魏以降而有斯人者乎。

或問貞觀之治。不幾於三代之盛乎。程子曰。開雕麟趾之意安在。

朱子曰。唐中宗事。致堂南軒皆謂五王合併廢中宗。因誅武氏。別立宗英。然當時事勢。中宗却未有過。正緣無罪被廢。又是太宗孫。高宗子。天下之心思之。爲他不憤。五王亦因此易於成功耳。中宗後來所爲。固是謬。然當時便廢他不得。

南軒張氏曰。致堂胡氏論五王不誅武后事。曰。武氏誠當誅。但旣立其子。難誅其母。或者以爲予奪輕重之間。不過告於唐家宗廟。廢置幽處之耳。然以中宗之昏庸。其復之如反手耳。亦豈是長策。以愚觀之。五王若有伊周之見。則當時復唐家社稷。何必湏立中宗。中宗雖爲武后所廢。然嘗欲傳位與后父。是其得罪宗廟。不可負荷。已自著見。五王若正大義於唐家。見存子孫中。公選一人。以承天序。告於宗廟。誅此老嫗。則義正理順。唐祚有泰山之安矣。



橋謙曰此論最快。然中宗既廢。此一天子置之何地。○晉曲沃武公殘同氣以取國。至獻公乃盡滅桓莊之族。獻公之子九人。唯存一重耳。遂詛無畜羣公子。而晉無公族。卒爲六卿所分。唐太宗驅除兄弟及身而有承乾之變。天假手於武氏。盡殺其子孫。祇留一二。其後如明皇一日殺三子。肅宗殺建寧。世有此禍。何異鱸魚之自食其類也。天道之不爽如此。何二唐之相似也。

龜山楊氏曰。狄仁傑在武后時。能撥亂反正。謂之社

稷之臣可也。然亦何嘗挾數任術。觀史氏所載。其議論未嘗不以正。當時但以母子天性之說告武后。其濱於死者亦屢矣。卒至武后怒而言曰。還汝太子。夫豈嘗姑務柔從。以陰幸事之成乎。孟子曰。君子創業垂統。爲可繼也。若夫成功則天也。人臣之事君。或遠或近。或去或不去。歸潔其身而已可也。豈可枉已以求難必之功乎。

或問陸宣公旣貶。避謗闔戶不著書。祇爲古今集驗方。朱子曰。此亦未是。豈無聖經賢傳。可以玩索。可以

討論終不成。和這個也不得理會。○宣公奏議末數卷論稅事。極盡纖悉。是他都理會得來。此便是經濟之學。

朱子曰。楊綰用而大臣損音樂。減賜御。則人豈可不有以養素自重耶。

涑水司馬氏曰。忠臣不二君。賢女不二夫。策名委質。有死無二。天之制也。彼馮道者。存則何心。以臨前代之民。死則何面。以見前代之君。自古人臣不忠。未有如此比者。

朱子曰。近得周益公書。論呂范解仇事。曰。初范公在朝。大臣多忌之。及爲開封府。又爲百官圖以獻。因指其遷進遲速次序。曰。某爲超遷。某爲序遷。如是而爲公。如是而爲私。意頗在呂相。呂不樂。由是落職。出知饒州。未幾。呂亦罷相。後呂公再入。元昊方犯邊。乃以公經畧西事。公亦樂爲之用。嘗奏記呂公曰。相公有汾陽之心之德。仲淹無臨淮之才之力。後歐陽公爲范公神道碑。有懽然相得。戮力平賊之語。正謂此也。公之子堯夫。乃不以爲然。遂刊去此語。前書今集中。

亦不載疑亦堯夫所刪他如叢談所記說得更乖其  
謂呂公方寸隱微雖未可測然其補過之功使天下  
實被其賜則有不可得而掩者范公平日胸襟豁達  
毅然以天下國家爲已任既爲呂公而出豈復更有  
匿怨之意况公嘗自謂平生無怨惡於一人此言尤  
可驗忠宣固是賢者然其規模廣狹與乃翁不能無  
間意謂前日旣排申公今日若與之解仇前後似不  
相應故諱言之却不知乃翁心事正不如此

爲謙曰說文正公心事極明然呂公後舉恐亦是

舉鄭公使遼之意。忠宜窺見此旨。故不欲言其父。慊然與之相得。此亦人子之心。不妨並行。

程子曰。溫公能受盡言。儘人迂逆。終不怒。便是好處。南軒張氏曰。司馬溫公改新法。或勸其防後患。使他人答之。必曰。苟利社稷。遑恤其他。只如此說。已自好。溫公乃曰。天若祚宋。必無此事。更不論一己利害。想其平日所養。故臨事發言。能如是中理。雖聖人不過如此說。近於終條理者矣。

撫謙曰。司馬公社稷臣。其言祚宋。在國家起見。若

聖人自是在生民起見。○近甲申之變。念臺劉公  
至杭。諸生聚問此變真否。劉公答曰。臣子之義。不  
忍言真。余後以此問問友人。謂宜如何答。或言真。  
或言未真。乃嘆公倉卒之言。發於至性如此。

元城劉氏謂馬永卿曰。金陵有三不足之說。聞之乎。  
永卿曰。未聞。曰。金陵用事。同朝起而攻之。金陵闕衆。  
論進言於上曰。天變不足懼。祖宗不足法。人言不足  
卹。此三句。非獨爲趙氏禍。乃爲萬世禍也。

龜山楊氏曰。神宗嘗問伯淳。王安石如何人。伯淳曰。

安石博學多文。則有之。守約則未也。又嘗問是聖人否。伯淳云。詩稱周公。公孫碩膚。赤舄几几。聖人蓋如此。若安石剛褊自任。恐聖人不然。

撫謙曰。安石立法之誤。尚有限。其大誤在衆君子不行其法。而乃引用小人以敵之。如此。則雖果周公之法。亦必敗矣。大抵會做事人。必有同事之君子。無其人事。雖當不可爲也。宋祖欲遷關中。太宗與趙普爭之。只得止了。嘆曰。不及百年。天下民力竭矣。蓋太祖雖遷。須要此二人守成。二人不肯遷。



亦何益。故止。此英雄舉動。未嘗任意也。

先儒史論。載於大方者多矣。採其要者。著於篇言。雖寡思過半矣。

性理大中卷之二十五終